

禮記偶箋

序

萬子克宗作學禮質疑四方之士爭傳誦之以爲薛士隆陳君舉不及也已復著禮記偶箋及儀禮商周官辨非諸書勾稽穿穴考同訂異往往櫛比字句之微爬搔疏證以發古人之覆真足爲先儒之諍友焉嘉淑每讀其書未嘗不歎其叅訂之詳思慮之細裁識之精卓然度越于尋常也自昔兩漢能文之家皆原本經學推極六藝雖司馬長卿輩聲譽最高不得與仲舒劉向比絜晉魏以後詞章日盛而經學漸晦然自南北朝時兵戈相尋殆無暇晷疑于詩書道息而北朝人士辯論禮文儀節往往援據詳博非後人所及然後歎今之學者處

莽滅裂沾沾小文如秋潦之滌洄無當于江河之流是源是委也顧克宗嘗著春秋說百餘萬言哀然成集矣不戒于火而三禮則散文別帙散爲數書蓋其疏麟經也薈叢諸家之文小列同異無使絀漏而已至于二戴之龐襍周官之訛謬正以儀禮之文而或缺或隱昔人稱讐書如掃落葉生千載之下以一已之心思智慮衡度而釐定之懼其多所未盡亦猶落葉之難除故隨所見書之畧成數種既精且詳矣若猶有未敢自信者克宗之爲學勤而且慎如此嗚呼此其所爲不可幾及者矣往余讀季本諸人所纂述下及何楷倜然離經畔道以傳會穿鑿爲能竊意六經自馬鄭以後更千餘年數

百家之推辯雖義理無窮而大指已盡今得克宗所解
駁皆先儒未發之秘洞若觀火而了無格閼乃知道文
剩義要自無盡善讀書者自得之相證於千載之上無
不可也克宗屬余爲序余於六經尤無所窺見何繇推
述克宗之指歸且克宗年力甚富著述當亦日益多上
下古昔以羽翼六經未易測其涯涘袁本初稱鄭康成
以布衣雄世志不朽之盛事非一世之所擅彼本初者
何足以知康成哉輒爲之序以復克宗冀附克宗之書
以傳固不自知其固陋矣

歲在壬戌三月旣望同學弟海昌陸嘉淑辛齋譔

禮記偶箋目錄

卷一

曲禮 三十條

檀弓 三十六條

卷二

王制 十一條

月令 十四條

曾子問 七條

文王世子 六條

禮器 四條

卷三

郊特牲 七條

內則 二條

玉藻 九條

明堂位 五條

喪服小記 二條

大傳 二條

少儀 四條

學記 二條

樂記 二條

雜記 五條

祭法 三條

祭義 一條

祭統 一條

深衣 三條

冠義 一條

鄉飲酒義 三條

射義 二條

聘義 一條

禮記偶箋卷一

四明萬斯大克宗學

曲禮

七十曰老而傳

傳卽儀禮所謂傳重也。七十筋力已衰，主祭之重不能勝任，故傳之於子。觀王制云：七十不與賓客之事。又云：七十致政，唯衰麻爲喪，則其不能主祭，可以類推矣。禮器記季孫之祭，質明行事，晏朝而退，儀禮少牢特牲祭禮最爲繁委。七十者豈能勝乎？或疑傳重主宗子言，老而傳者，不唯宗子。予曰：固也。彼五十服官政，大夫也。如子言，將人人必爲大夫乎？

夫爲人子者三賜不及車馬

賜者上與下之稱諸家解爲錫命非也錫命典禮賜物
隨意三賜至再至三也玉藻云親在行禮於人稱父內
則云不敢私與爲人子而有車馬旣貴顯矣其以父命
賜物於人雖至再三亦不可及於車馬蓋車馬至重非
他物比坊記云父母在饋獻不及車馬與此同

故州閭鄉黨稱其孝也兄弟親戚稱其慈也僚友
稱其弟也執友稱其仁也交遊稱其信也

五句之首當有

文闕

此必其平日有孝慈仁弟信五者之實然後能有是稱
若止是三賜不及車馬未可卽爲純孝人亦未必遂稱

之故愚謂五句之首當有闕文。蓋此篇集他書要語成篇。朱子謂大意相似而文多不屬是也。

毋踏席樞衣趨隅

此羣居升席之儀也。玉藻云登席不由前。句爲去聲蹠席是不問禮席羣席升者皆不由前。所以然者爲恐蹠席也。下文云席南鄉北鄉以西方爲上東鄉西鄉以南方爲上。上指席端下指席末。禮席升降皆正由上下鄉飲酒禮主人介升席自北方降自南方賓升降皆自西方是也。燕禮大射鄉射升降皆然。羣席升旣不由前亦不正由上下而由席隅。蓋禮席一席一人羣居則一席四人以長幼爲次升由上下則踐他人位是爲踏席必從

禮記集說卷一
席隅升坐乃爲得禮故戒之曰毋踏席復著其禮曰摳衣趨隅

席南鄉北鄉以西方爲上東鄉西鄉以南方爲上孔疏因此文連請席何鄉遂謂平常布席如此禮席不然非也鄉飲酒禮介坐西南方而鄉東主人坐東南方而鄉西記云主人介升席自北方降自南方註謂升由下降由上是東鄉西鄉以南爲上也賓坐西北而南鄉其升降皆自西方以東西鄉者推之則西方爲上可知矣又室中以奧爲尊祭時太祖位奧東鄉昭穆之位自西而東則南鄉北鄉非以西爲上乎

冠毋免

免如字。謂常時不得免冠也。舊說讀音問此喪冠矣。人縱不循禮。豈有無喪而肯服喪冠者乎。

母絜羹。母歡醢。客絜羹。主人辭不能亨。客歡醢。主人辭以寢。

客絜羹四句。正明所以不可絜羹歡醢之故。言爲客而絜羹歡醢。主人卽以此辭。客將何以爲情乎。故不可也。若使人於君所。則必朝服而命之。使者反。則必下堂而受命。

朝服而命。必拜而命。下堂而受。必拜而受。孔子問人於他邦。且再拜而送。況君乎。

孫可以爲王父。尸子不可以爲父。尸

孫爲祖尸。昭穆同也。或問太廟合祭始祖羣祖皆有尸。宜如何。曰。據祭統。尸爲祭者子行。然合祭必取子行。則昭穆有不應者。祖尸必以孫。然始祖又何從得孫。唯取王族最尊行爲始祖尸。羣廟有孫取孫。無孫取孫之孫行可矣。指高祖之祖父二廟世遠未必有孫。卽取孫之孫。昭穆同也。大抵諸經言尸皆主祭。父言不必泥也。

二名不偏諱

謂二字爲名者不偏主一字諱之也。若主定一字諱一字不諱。是爲偏諱。

執玉其有藉者則裼無藉者則襲

儀禮聘禮記曰。凡執玉無藉者襲。此條蓋卽是語而申。

之有藉。謂既聘而享。束帛加璧。璧在帛上。如物有承藉。然無藉。謂執圭行聘。特達無所藉。按聘禮。聘之日。賈人取圭授上介。上介授賓。賓襲執圭入門左。揖讓升西楹。西東面致命。公側襲受玉。賓出。公側授宰玉。所謂無藉者。襲也。賓既出。公褻而降。賓乃褻奉束帛加璧。享君入門左。揖讓如初。升致命。公受幣。賓出。所謂有藉者。褻也。古人冬月衣裘行禮。有當褻時。有當襲時。不得相因。大抵禮盛則襲。禮殺則褻。故玉藻曰。禮不盛。服不克。又曰。服之襲也。克美也。裘之褻也。見美也。聘禮盛。故襲。享禮殺。故褻。按褻有與袒連言者。見於詩。見於孟子。大都皆傲慢不恭之狀。有與襲對言者。見於聘禮之賓主見。

於曾子子游之弔而最詳於玉藻之篇大都皆行禮時
文質相變之宜二者不得相混鄭氏註聘禮云裼者免
上衣見裼衣凡袒裼者左註玉藻云裼衣之上復有衣
袒而有衣曰裼賈疏云冬時襯身禪衫又有襦袴襦袴
上有裘裘上有裼衣裼衣上又有上服皮弁祭服之等
裼者袒衿前上服見裼衣也襲者掩之孔疏云近體有
袍襌之屬其外有裘裘上有裼衣裼衣上有襲衣襲衣
上有常著之服則皮弁之屬也掩而不開謂之襲開皮
弁及中衣左袒出其裼衣謂之裼說微不同皆不免與
袒裼混愚考玉藻言諸裘皆言衣以裼之知裘外之衣
謂之裼衣也又言裘之裼也見美也君在則裼盡飾也

夫臣之見君必朝服則裼衣卽朝服矣卽如旣聘而享賓主必裼以將事則裼衣非禮服乎推此則凡裘外之裼衣皆禮服矣其謂之裼者何說文裼字从衣从易裘因事變衣因裘易也又裼有袒義古人禮服皆直領無衿裘上衣裼衣胸前裘色自然微露如袒者然是之謂見美是之謂盡飾故曰裼其襲奈何玉藻云服之襲也克美也夫其於裼曰裘之裼裼在裘外也於襲曰服之襲襲在裼外也裼衣見美盡飾而加衣以掩之使美充於內而不外見故曰襲然經不詳襲衣之制據說文釋襲爲左衽袍古唯大小斂之衣皆左衽生人左衽非聖人所許反復思之疑卽深衣也古人禮服無衽中衣袍

釋之屬有右衽未必有左衽唯深衣右衽在外當右旁左衽在內當左旁且衣裳相連全體深邃服之以掩蓋裼衣則美不外著又深衣篇曰可以爲文可以爲武可以治擯相可以治軍旅其用至廣聘禮文事也擯相類也禮盛而服之以襲不亦可乎吾爲約而言曰冬時服裘裘上有裼衣加深衣則曰襲不加深衣則曰裼裼襲之解如是而已矣又裼襲專就裘說不兼葛說

大夫士見於國君君若勞之則還辟再拜稽首諸侯之上大夫卿聘禮卿爲使者至彼國曰賓大夫爲上介士爲衆介此勞之是行聘享私覲之後主君送賓及大門內公問君問大夫訖公勞賓賓再拜稽首公答

拜公勞介介皆再拜稽首公答拜儀禮不言還辟此文補之

君若迎拜則還辟不敢答拜

按聘禮聘之日公皮弁迎賓於大門內大夫納賓賓入門左公再拜賓辟不答拜辟卽還辟也

天子當依而立諸侯北面而見天子曰覲天子當宁而立諸公東面諸侯西面曰朝

儀禮有覲禮無朝禮第就儀禮考之知朝覲只一事無二禮朝先而覲後耳何以言之覲禮於覲之曰云侯氏裨冕乘墨車載龍旗弧韜乃朝以曲禮此經叅之此時應有朝禮蓋覲禮行於廟廟在路寢東竊意是日天子

將入廟受覲。從路寢乘車而出。諸公侯先俟於門外。天子至。寧下車而立。諸公侯於是分班朝見。以通姓名。卽所謂天子當寧而立。諸公東面。諸侯西面曰朝也。儀禮不具。文之畧也。已而天子入廟。負斧依南面而立。侯氏入門右坐奠圭。再拜稽首。擯者謁侯氏坐取圭。升致命。王受玉。侯氏降階。東北面再拜稽首。擯者延之曰升。升成拜乃出。卽所謂天子當依而立。諸侯北面而見天子曰覲也。朝先覲後。通言之。皆曰朝。但臣之見君以北面爲正。故儀禮獨以覲名。先儒信周官謂春見曰朝。受摯於朝。受享於廟。秋見曰覲。一受之於廟。夏宗依春。冬遇依秋。孔疏更以爲六服諸侯。每服別分爲四。一分朝春。

一分宗夏一分覲秋一分遇冬按郊特牲云君之南鄉答陽之義也臣之北面答君也記曰唯詔於天子無北面如先儒說唯秋冬覲遇者行北面再拜春夏朝宗者止東西一立而退永無北面而朝之禮何以明君臣之義乎愚故以覲禮及此經爲正周官宗遇辨見本條

諸侯未及期相見曰遇

按此文卽左傳所云不期而會曰遇也言兩君未及相期忽然道塗相見故曰遇非謂有期日而先期相見也舊說非

問士之富以車數對

士已食祿公朝不與齊民伍縱未有命車亦得自爲之

故問其富則以車數對見其家富者得多爲車數未有定也。若如舊說上士三命得賜車馬則命車唯一而已。數豈無定且又何以見其富乎。

天子祭天地

周制子月祭天於郊。午月祭地於社。中庸云郊社之禮所以事上帝是也。郊在南郊。祭法謂之太壇。周官謂之圓丘。社在北郊。祭法謂之太折。亦曰太社。周官謂之方丘。北郊他經不見。觀禮所謂禮月於北門外是也。詳見質疑。

支子不祭

大傳云庶子不祭明其宗也。推此而言唯大宗得祭始

祖族人無遠近皆宗之繼高曾祖禰之小宗亦不得祭也高曾正適之宗得祭高曾庶祖禰正適之宗亦不得祭也鄭註庶子不祭祖云凡正體在乎上者視下正猶爲庶也得之矣

大饗不問卜不饒富

方氏謂禮言大饗有別月令季秋大饗帝禮器郊特牲大饗腥祀帝也禮器又言大饗其王事大饗之禮不足以大旅祫祭先王也郊特牲又言大饗君三重席而酢仲尼燕居言大饗有四坊記言大饗廢夫人之禮兩君相見之禮也雜記言大饗卷三牲之俎凡饗賓客之禮也先儒以此大饗爲冬至祀天夏至祭地愚考禮經祀

帝祀先牲日皆卜此言不問卜乃指兩君相見及凡賓客之禮也賓客既行朝聘當饗卽饗牲日皆不卜其言不饒富卽左傳所云饗以訓恭儉之謂也舊說非

凡摯天子鬯諸侯圭

按雜記贊大行曰圭公九寸侯伯七寸子男五寸合之此經知五等諸侯皆以圭爲摯特有長短之差不得泥周官子執穀璧男執蒲璧之文反疑此經爲畧贊詞爲失也說詳周官辨非

檀弓

孔子旣得合葬於防曰吾聞之古也墓而不墳今丘也東西南北之人也不可以弗識也於是封之

崇四尺孔子先反門人後雨甚至孔子問焉曰爾
來何遲也曰防墓崩孔子不應三孔子泣然流涕
曰吾聞之古不修墓

按此則墳與墓有別封土曰墳實土不封曰墓然既葬
之後雖封土爲墳通謂之墓可也防墓崩者所封之四
尺因雨甚而崩非崩及兆域至見尸柩也考士喪禮筮
宅家人營之掘四隅外其壤掘中南其壤是掘地爲墳
也墳深故其下棺也君用四綽二碑大夫二綽二碑士
二綽無碑綽亦曰引葬時屬引懸棺而窆故墓無崩道
其或有水潦冲嚙直當改葬而不止於修故禮有改葬
綽之服豈有孔子於親墓崩及兆域第虛援古不修墓

之言而置之者乎。故知其所崩者四尺之封也。

魯婦人之髻而弔也。自敗於臺鮒始也。

左傳襄公四年邾人莒人伐鄆臧孫紇救鄆侵邾敗於狐駘國人逆喪者皆髻。魯於是乎始髻。據此是敗後髻以逆喪。非敗後相弔以髻也。特自此之後遂以髻行弔耳。故此本其始而言之。若謂敗後相弔以髻則夫死之婦。自哀不暇遑及弔人。夫存又不必婦人行弔。故當通左傳解方不泥。

孔子既祥五日彈琴而不成聲十日而成笙歌

祥禫之說鄭玄主異月王肅主同月今按此條及前朝祥暮歌孔子謂踰月則善喪服四制祥之日鼓素琴正

合是篇所云祥而縞是月禫徙月樂及三年間所云三年之喪二十五月而畢王肅之言爲可據。士虞禮間傳皆言中月而禫。謂禫在祥月中也。卽令喪事先遠日祥或在下旬。然祥後卽禫亦不害爲中月。鄭乃據喪服小記中一以上。學記中年考校兩文釋中爲間。遂定爲二十七月。而後世因之。不思三年間一篇出於荀子。荀子周人也。二十五月之言必非無據。奈何與之相背乎。然先儒多知二十七月之不合於經。而不敢昌言正之者。親喪寧厚。且相沿已久。不能卒變也。

孔子之喪。公西赤爲志焉。飾棺牆置翣設披。周也。設崇殷也。綢練設旒夏也。子張之喪。公明儀爲

志焉。褚慕丹質蟻結於四隅。殷士也。

志記也。若今墓志然。飾棺之物。孔氏顓孫氏主之。非公西赤公明儀爲之也。按喪大記。大夫之喪。畫帷黻。嬰畫。嬰各二披。前纁。後玄。士布帷。畫。嬰二二披。用纁。孔子爲大夫。子張爲士。循周制可也。況從周固夫子之志。乃用夏殷之飾。胡爲乎意當時之人。疑聖賢之喪必有異。遂訛傳以爲然。記者因而志之耳。

經也者實也

此明經之義實者誠信之謂也。人子於親喪。附身附棺。必誠必信。故因經著義。欲人之顧名而自盡也。

及葬毀宗躡行出於大門殷道也

穀梁傳曰。作主壞廟有時。日於練焉。壞廟。壞廟之道。易
簷可也。改塗可也。按此文。毀宗。卽壞廟也。下篇云。殷朝
而殯於祖。又云。殷練而祔。卽祔於此祖。殷之葬期不見
於經。或卽在練時。毀宗以出者。示將遷祔也。其出必從
廟門。舊說謂毀牆而出。非也。前此朝祖業從廟門入。今
日仍從廟門出。何害於禮。

子思之母死於衛

舊說伯魚死。其妻改適於衛。此妄說也。伯魚之死。年幾
五十。其妻亦旣衰。況上有聖舅。下有賢子。豈比窮民無
告者。而至有改適之事乎。故知妄也。謂孔子子思皆出
妻亦然。

曾子曰尸未設飾故帷堂小斂而徹帷仲梁子曰

夫婦方亂故帷堂小斂而徹帷

設飾以明衣裳衣尸也始死身上無衣唯覆斂衾至此
乃有飾故曰設飾按士喪禮始死卽復楔齒綴足設奠
於尸東遂帷堂以未沐浴尸身未加明衣也旣帷堂主
人命赴入坐於床東衆主人在其後西面婦人挾床東
面親者在室衆婦人戶外北面衆兄弟堂下北面是卽
始死時之位夫婦未嘗亂也仲梁之言何據

宋襄公葬其夫人醯醢百甕曾子曰旣曰明器矣
而又實之

夏后氏用明器殷人用祭器明器鬼器也當虛祭器人

器也。當實。宋殷之後。當用祭器。此醢醢百甕。曾子謂爲明器。要知襄公非不用祭器。必其侈張過制。於祭器常數之外。又用明器而實以醢醢。是不知明器祭器之有別也。故曾子譏之。其侈不合禮。卽此可見。

孔子之喪。有自燕來觀者。舍於子夏氏。子夏曰。聖人之葬人。與人之葬聖人也。子何觀焉。昔者夫子言之曰。吾見封之若堂者矣。見若坊者矣。見若覆夏屋者矣。見若斧者矣。從若斧者焉。馬鬣封之謂也。今一日而三斬板而已。封尙行夫子之志乎哉。註疏云。封高四尺。此因防墓封崇四尺。謂葬孔子亦高四尺也。竊恐未然。板廣二尺。三板凡六尺。周禮大夫制

也。孔子爲大夫，正當六尺。若斧者，南北壁立，東西陵遲，上狹下舒，若斧形，板施於南北。

復櫛齒綴足飯設飾帷堂並作

按士喪禮，復與櫛齒綴足絕氣卽行之。設飾指沐浴後，設明衣裳一事。設飾後乃飯。以士喪禮序言之，復櫛齒綴足最先，帷堂次之，設飾次之，飯又次之。言並作者，謂並作於一日也。

旣殯旬而布材與明器

按士喪禮，將葬旣井椁，工獻材於殯門外。此云旣殯旬而布之者，先布而乾之，至葬方可用也。

父母之喪，哭無時，使必知其反也。

此極形容孝子思慕迫切之情言其哭無時者其心若使父母必知之庶幾其反而還也其疑辭

天子之棺四重水兕革棺被之其厚三寸槨棺一梓棺二四者皆周

水兕革棺并厚三寸孔疏云各厚三寸非也此天子親身之棺外加槨四寸槨卽槨棺也又加屬棺六寸大棺八寸二棺卽梓棺也見喪大記凡四重共厚二尺一寸諸侯無革棺觀上章云君卽位而爲槨又曾子問云君出疆以三年之戒以槨從皆不言有革棺可見

柏槨以端長六尺

此天子之槨也據上文天子之棺四重厚二尺一寸是

上下左右皆合得四尺二寸。又據喪大記小斂君衣十
九稱大斂君衣百稱。則天子當益多。棺中容尸須寬廣
得四五尺。是棺之上下左右高廣且八九尺矣。而又人
身長短中人不下七尺。就謂周衣服包裹當又加長。棺之
前後兩和合得四尺二寸。并容尸身八九尺。當共長一
丈三四尺。夫以長一丈三四尺高廣八九尺之棺而柏
椁止長六尺。不知如何用之。不可考也。

君之適長殯車三乘。公之庶長殯車一乘。大夫之
適長殯車一乘。

此送葬之車。卽士喪禮所謂乘車載皮弁服纓轡貝勒
懸於衡。道車載朝服。橐車載簠簋之車也。以其爲送葬

之車。故亦曰遣車。雜記曰。遣車視牢具。言其多寡之數。視朝聘時主國相待之牢具。禮器云。諸侯七介七牢。大夫五介五牢。故此下文云。國君七介。遣車七乘。大夫五介。遣車五乘。介通書。一介臣。中庸作一个臣。可見凡禮儀降殺以兩大。大夫五則士當三。故士喪禮車三乘也。按士喪禮將葬。柩朝於祖。薦車薦馬。遣奠後馬出自道。車各從其馬。駕於門外。及行。茵苞明器先。車從於後。苞者何。柩行時取遣奠牲下體。包之以葦。記云。葦苞長三尺一編是也。棺既下壙。贈畢。藏器於旁。加見藏苞。簪於旁。舊說謂遣車以載遣奠苞牲體得名。且泥雜記。遣車視牢具。置於四隅之文。謂遣車之制甚小。載苞置於椁。

之四隅夫甚小之車豈能容三尺之苞而苞之不以車載喪禮業有明文且藏於椁旁並不於四隅蓋不知下文孔子所謂塗車乃從葬之車而謬以遺車當之也餘詳下文及雜記篇

季武子寢疾

云

及其喪也曾點倚其門而歌

按春秋書季武子之卒在魯昭公七年孔子生於襄公二十二年至此方十七歲曾點之年史記不著論語四子侍坐以齒爲序點居子路下子路少孔子九歲時方八歲點當益幼矣倚門而歌必無此事卽有之亦是兒戲乃欲據以言狂何邪

大夫弔當事而至則辭焉

辭謂告以有殯斂之事非辭之使去弔者亦不因辭而去也畢事乃出拜之按士喪禮小斂於戶內奉尸俛於堂主人降西階拜賓大斂時有大夫則告既斂主人降拜大夫之後至者後至者卽當事而至者也

喪公弔之必有拜者雖朋友州里舍人可也

按士喪禮三日成服杖拜君命及衆賓謂往拜謝弔也既夕記云主人乘惡車註云拜君命及衆賓所乘是也此言公弔之必有拜者正指往拜然衆賓亦往拜而獨言公者喪家有主後君與衆賓之弔皆當往拜若無主後則攝主但往拜君弔而衆賓不往拜也喪大記曰喪有無後無無主雜記曰無族人則前後家東西家或里

尹主之故此言朋友州里舍人可也。檀弓孔子哭伯高子貢爲主且曰。爲爾哭也來者拜之。則來弔而有拜者自不必言。但攝主於來弔者。君與衆賓皆拜往拜則不及衆賓耳。

有若之喪悼公弔焉子游擯由左

按禮君臨臣喪必升自阼階。君自爲主。臣不敢有其室也。子游擯請事也。士喪禮公賁擯者出請事故知弔亦請事由左。尊君也。不敢以賓禮待君也。然觀雜記云。泄柳之母死。相者由左。泄柳死其徒由右。相由右。相泄柳之徒爲之也。似凡喪擯皆由左。而由右始於泄柳之徒。然則子游之由左。何以特許之乎。蓋君弔則擯當由左。

賓弔則擯當由右。當時君弱臣強。君弔擯亦由右。而子游獨由左。故美而志之。泄柳之由左。殆因當時美子游之由左。遂以爲賓弔亦當然。相沿而失之耳。

帷殯非古也。自敬姜之哭穆伯始也。

按士喪禮。旣殯。朝夕哭。婦人卽位於堂南上。哭。無帷殯之文。敬姜賢婦。以遠嫌。帷殯無乖禮意。故不曰非禮而曰非古。

有所袒有所襲哀之節也。

按士喪禮。主人親含尸。左袒。含畢。襲小斂訖。袒。奉尸俛於堂。襲將大斂。袒。斂於棺。卒塗。襲將葬。啟殯。袒。朝於祖。襲載柩。袒。卒束。襲將祖。袒。旣祖。襲柩行。袒。出宮。襲將窆。

屬引袒。笄訖襲。又君視斂。君賁皆袒。畢事襲。此言有所袒。有所襲。哀之節者。蓋喪中有事。則哀加甚。事過則哀少。殺而袒襲因之。然其所以袒者。以便於行事。遂因以爲節耳。此與裼襲不同。亦與袒裼不同。裼襲指裘外之衣。說見前袒裼則袒去裘外之裼衣。而全露其裘。故裼襲爲行禮質文之變。而袒裼爲傲慢無禮之容也。此喪中之袒。則捲起衣袂。而露其肩。襲則掩之。蓋孝子未成服。衣深衣成服。衣衰袂皆二尺二寸。不袒則妨於治事。射儀之袒襲。祭及養老。割牲之袒皆然。覲禮之右肉袒。乃自右袒去朝服也。士虞禮之鉤袒。乃以手指鉤其袂而起之也。此二者與諸袒有異。亦不可混袒裼說。

弁經葛而葬與神交之道也有敬心焉周人弁而葬殷人皐而葬

按王制云周人弁而祭殷人皐而祭祭交神之事吉禮也。今葬亦首加弁。嫌過近於吉。故仍加麻經於首。而要葛帶不純凶。亦不純吉。曰與神交之道何也。親始死有尸。既殯有柩。葬則尸柩俱歸於無。迎精而反。祭之宗廟。以鬼享之。親而神之。自此而始。服祭服之弁。而以神道事其親。故曰與神交之道也。舊說解爲山川之神者非。葬於北方北首三代之達禮也之幽之故也。

古者井田制行。民皆族葬。故孟子云死徙無出鄉。王制云墓地不請。所謂北方北首。亦就其鄉之北耳。下文趙

文子觀於九京豈九京亦在晉國之北諸大夫皆於此葬乎

葬日虞弗忍一日離也是日也以虞易奠卒哭曰成事是日也以吉祭易喪祭明日耐於祖父其變而之吉祭也比至於耐必於是日也接不忍一日末有所歸也

按雜記唯士葬與卒哭同月天子至大夫卒哭皆後葬二月先儒謂虞祭間日舉唯可言於士禮考之春秋葬必柔日葬日虞故士虞禮云虞用柔日也間一日再虞又間一日三虞皆柔日三虞之次日剛日也乃卒哭卒哭之明日乃耐三虞卒哭附祭三日接續行事故曰其

變而之吉祭也。比至於祔，必於是日也。接變謂喪祭變爲吉祭也。先儒釋變爲變禮，固非。謂三虞與卒哭皆用剛日，唯卒哭與祔祭連接，亦非。士虞記曰：始虞用柔日，曰哀薦祫事。又曰：再虞皆如初。曰哀薦虞事。三虞卒哭，他用剛日，亦如初。曰哀薦成事。夫言再虞皆如初，則皆字包三虞立文。以上文未及三虞，故下復言三虞以足之。三虞二字不連卒哭讀。卒哭他用剛日，謂卒哭別用剛日也。且卒哭祝辭曰哀薦成事，正與此經卒哭曰成事合。先儒連三虞卒哭爲句，謂同用剛日，則虞祭亦可曰成事矣。不疑與此經戾乎？祔於祖父，祔主于祖廟也。上文云重主道也，足知天子至大夫士始死必有重重

徹必有主。先儒因士喪士虞及特牲少牢諸禮皆不言主。遂謂天子諸侯有主。大夫士無之。彼孔悝去國猶載祔以行。無主何以有祔。藏主以諸禮之不言主。特文不具耳。因此而謂大夫士無主。然則大戴禮諸侯遷廟第言奉衣服者皆奉以從祝。不言奉主。將謂諸侯亦無主乎。主既祔則主藏於廟。三年喪畢。諸侯則遷死者之高祖於祧。遷死者之祖於高祖之廟。而死者之主正位於祖廟。不拘昭穆皆然。大夫士則祖與高祖同廟異室。喪畢遷高祖之主而祖主遷於高祖之室。死者之主正位於祖室。不拘昭穆皆然。先儒謂祔後主反於寢。上篇云喪事有進而無退。坊記亦云。喪禮每加以遠。考士虞禮將

旦而祔則薦薦餞也。既餞而祔於祖矣。復反於寢。既進而退。自遠而近。有是理乎。

塗車芻靈自古有之。明器之道也。孔子謂爲芻靈者善。謂爲俑者不仁。不殆於用人乎哉。

芻靈畧似人形。塗車畧似車形。故可從葬。觀此則知以遣車爲從葬者皆妄也。古用芻靈。後易爲俑。孔子善芻靈而不仁。俑知後世非皆用俑也。蓋有之耳。

國君七个遣車七乘。大夫五个遣車五乘。

个介通介者。諸侯相朝。大夫出聘。從行之介也。雜記遣車視牢具而禮器云。諸侯七介七牢。大夫五介五牢。是牢具之數。又視乎其介。故此言介不言牢。該之也。士不

言其數以大夫差之三乘可知。孔疏謂天子之士三乘諸侯之士無遣車。蓋泥於以遣車爲載苞從葬之車。而士喪禮無之。故爲此說。不知禮之降殺以兩止。就天子諸侯大夫士大段差之。不屑屑也。

人喜則斯陶陶斯咏咏斯猶猶斯舞舞斯愠愠斯戚戚斯歎歎斯辟辟斯踊矣。品節斯斯之謂禮。

據本文是哀樂相生之序。但此章是論喪禮之踊。上文云辟踊哀之至也。哀親之死。豈因樂極而生乎。諸家紛紛其說未悟斯旨。孔疏云鄭康成諸本亦有無舞斯愠一句者。而劉氏欲於猶斯舞之下增矣字。而刪舞斯愠三字。卽孔疏意。此爲可從。蓋上文固言愠哀之變也。此

言辟踊始於愾方與哀死意合

子卯不樂

註疏取桀紂死日爲說漢書張晏曰子刑卯卯刑子相刑之日故以爲忌而云夏殷亡日不推湯武以興乎愚謂二說當相備十二支相刑不但子卯獨忌子卯者更值夏殷亡日也若專指夏殷亡日不應因甲子乙卯兩日盡子卯而忌之也

衛柳莊死獻公與之邑裘氏與縣潘氏

縣如字不音玄蓋裘氏邑名潘氏縣名也

季康子之母死般請以機封公肩假曰般爾以人之母嘗巧則豈不得以其母以嘗巧者乎則病者

乎噫

公肩假謂般爾欲以人母試已之巧則豈不得以人之母試已之巧卽有病於爾乎諸說未合

戰於郎公叔禺人遇負杖入保者息曰

云

入保者句斷息曰二字連蓋禺人太息而言也負杖入保者老人避兵入保城邑者也禺人見之長噓鼻息而言如今人胸中忿恨噓氣爲聲聲從鼻出故曰息

卒哭而諱生事畢而鬼事始已旣卒哭宰夫執木鐸以命於宮曰舍故而諱新

京山郝氏曰故謂名新謂諡舍故諱新謂舍舊日之名而稱新諡以諱之也愚按晉語范獻子聘於魯問具山

敖山魯人以其鄉對獻子曰不爲具敖乎對曰先君獻武之諱也考史記獻公隱公之高祖武公隱公之曾祖范獻子聘魯在昭公二十二年獻公至昭公已十二世武公已十一世時猶諱具敖京山說是也舊說以故爲高祖之父當遷者非

虞人致百祀之木可以爲棺椁者斬之不至者廢其祀勿其人

百祀百年也木過百年堅老可爲椁材廢祀廢山澤之祀也廢祀勿人姑爲之令而已究屬可疑

叔仲皮學子柳叔仲皮死其妻魯人也衣衰而繆經叔仲衍以告請繆衰而環經曰昔者吾喪姑姊

妹亦如之未吾禁也退使其妻總衰而環經

按總衰四升有半布細而疏喪服傳列小功之首唯諸侯之大夫爲天子服之五服親族無用此者叔仲皮從學於泄柳叔仲皮死其妻魯人素知禮爲之服斬衰絞經時俗尙輕微妻爲夫有服總衰環經者皮之弟衍拘於俗見請於子柳欲令皮妻易服總衰環經且云昔吾喪姑姊妹亦如此無我禁者是不知總衰非姑姊妹之服并不知妻之爲夫更不同於姑姊妹也失禮已甚故子柳不答衍不悟其非退使皮妻改服總衰而環經舊解非

孔子曰衛人之祔也離之魯人之祔也合之善夫

此言卒哭明日耐主於廟之異。離之者孫雖耐祖。新生在祖主祔中。以物隔之也。合之者無物隔之也。祖孫一本之親。合之爲是。故孔子善魯舊說。以耐爲耐葬者。非

子

經孫

承天承式較刻

乾隆己卯歲

孫福重

禮記偶箋卷一終

禮記偶箋卷二

四明萬斯大克宗學

王制

制三公一命卷若有加則賜也不過九命

卷袞通袞以龍得名天子冕服十二章自日月星辰以下而名曰卷者衣有龍章龍形袞然尤昭著也上公王者之後得用天子禮樂故亦服袞冕然自龍而下無日月星辰蓋與天子同袞之名而不同其實天子之三公加一命得與上公同然此異賜非常法也鄭康成據左傳三辰旂旗之言謂周以日月星辰畫於旂而天子冕服止於九章考郊特牲云郊之日王建旂龍章而設日

月明堂位亦云旂十有二旒。日月之章是旂。未常有星辰也。左傳言三辰約畧之詞耳。且龍亦畫於旂。如鄭言亦當不列於衣矣。何以獨名衮乎。愚於周官司服詳辨之矣。

天子七廟三昭三穆與太祖之廟而七。諸侯五廟二昭二穆與太祖之廟而五。大夫三廟一昭一穆與太祖之廟而三。士一廟庶人祭於寢。

周制天子七廟。加文武二世室爲九廟。昭常爲昭穆。常爲穆。父子異昭穆。故異廟。兄弟同昭穆。故同廟異室。如此則無論父死子繼。兄終弟及。皆定以三昭三穆而無多少不齊對偶偏枯之慮。諸侯五廟者亦然。大夫三廟。

者其一昭一穆高與祖同一廟曾與禰同一廟皆異室以爲常適士二廟者亦然官師一廟者則高曾祖禰異室祀之庶人於寢亦祭高曾祖禰太祖始祖也其廟百世不遷大夫有太祖故其子孫適長世世爲大宗士無太祖親盡卽遷故其子孫適長亦祇爲小宗諸侯別子及異姓臣皆然詳見質疑○註疏載天子廟制王鄭不同余從王說蓋七廟者天子之常數三代所同也世室之有無多寡不可定此非常數也三代所異也據祭法夏后氏祖顓頊而宗禹則七廟之外更有禹廟又鯀列於郊亦當有廟是夏有九廟也殷人祖契而宗湯則七廟之外更有湯廟又冥列於郊與書稱大戊爲中宗武

丁爲高宗皆當有廟是殷有十一廟也周則初以后稷爲始祖合文武世室而爲九東遷之後祖文王合武世室而爲八說詳要之宗無定數而七廟之有常者三代曷有變哉或疑殷之三宗并數祖甲而茲獨不及何也曰書於祖甲不稱宗也不稱宗何以言殷有三宗曰并湯而數之也史記於太甲不稱太宗乎曰不見於經吾未敢信也

天子諸侯宗廟之祭春日禘夏曰禘秋曰嘗冬曰烝

按祭統亦云天子四時之祭春祭曰禘夏祭曰禘秋祭曰嘗冬祭曰烝與此文同蓋三代通禮也行於子午卯

酉月鄭康成謂爲夏殷之祭周則春曰祠夏曰禴以禘爲殷祭蓋泥於天保詩禴祠烝嘗一語不知此詩作於武王時而禴祠烝嘗是諸侯之祭武王末受命未遑制作尙以侯禮祀先故禴祀烝嘗遂見於詩迨周公相成王始祀先公以天子之禮定爲春禘夏禘秋嘗冬烝而禴祠烝嘗爲諸侯之制也時祭中夏禘最大每歲舉行先儒信緯書或謂三年或謂五年者皆不可信禮不王不禘此連諸侯並言者蓋春秋時若魯若晉俱僭行禘記者從僭後爲文誤信以爲固然遂與天子連言之耳詳見質疑

天子禴禘禘嘗禘烝

凡合祭曰禘。禘嘗烝皆合祭。故皆言禘。據此則知天子別無禘祭。凡諸經傳所言禘皆指禘嘗烝之祭也。但烝嘗二祭止太祖及羣廟而禘則上追太祖之所自出。下及於毀廟之主。其禘較烝嘗爲大。凡祭皆曰有事而禘之事較凡祭爲大。故春秋于文二年八月之禘書爲大事。而公羊釋之曰大禘也。詳見質疑。

諸侯禘。植禘一植一禘。

諸侯固不得行禘。卽就僭禘者言。亦無植祭之禮。蓋禘必於大廟。必合羣祖。此言一植一禘者。記者見閔二年春秋書禘於莊公。遂以爲植祭而云然也。當時魯禘周公以魯公而下諸祖配祭。至閔公時遂用禘禮祀莊公。

莊公分卑。周公至隱桓諸祖。無下就莊公之理。必是植祭。故記者誤指爲禮也。

司空執度度地居民

按考工記玉人職云。土圭只有五寸。以土地土地者。度地也。此司空執度。當準土圭以爲廣狹。然不必拘拘一圭爲一度也。

凡使民任老者之事食壯者之食

此篇後章云。五十不從力政。則此使民自不及老者。任事食食俱就壯者。言任老之事。寬其力也。食壯之食。厚其養也。大戴千乘篇云。太古食壯之食。攻老之事。與此同。舊說非。

赦從重

此所謂赦卽下文衆疑赦之者也書云罪疑唯輕則所謂赦者特赦其重罪減從輕罪非竟赦而不問也從重者減二等若三等也罪減從輕而曰從重者減等之罪則輕而赦之之意則重也

凡制五刑必卽天論郵罰麗於事

郵傳行書不畱滯論罪者事至卽決如郵之行書不使畱獄故曰論郵

道路男子由右婦人由左車從中央

註云道中三塗是已然必左右皆一定往來悉由之男女方不雜竊意塗之從者以西爲右以東爲左塗之橫

者以南爲右以北爲左如舊說則往之男與來之婦遇來之男與往之婦遇不病雜乎

古者以周尺八尺爲步今以周尺六尺四寸爲步
古者百畝當今東田百四十六畝三十步

按孟子云夏后氏五十而貢殷人七十而助周人百畝而徹非授田實有多寡由尺步有廣狹也觀此文可見古者指殷時今指周時殷周之步皆六尺四寸但殷尺大於周尺五之一故殷之一步以周尺計之則爲八尺殷之百畝以周步計之爲百五十六畝二十五步也然則殷之七十畝周之百畝有奇矣殷周如此夏從可知○按鄭註所算田畝數與經文不同經文有誤鄭註爲

是註又曰。按禮制。周猶以十寸爲尺。戰國時變亂法度。或言周尺八寸。是鄭亦不定周尺爲八寸也。孔疏乃更以八寸尺爲數。是確信周尺爲八寸矣。按說文釋咫字。云八寸爲咫。周尺也。許君之意。謂古以八寸爲咫。周尺短于古尺五之一。古八寸之咫。已爲周十寸之尺。故云爾也。其釋尺字。云十寸爲尺。尺既爲十寸。則知周尺雖卽古之咫。然亦自分爲十寸。故謂周尺止于古之八寸。則可謂周尺止分八寸。則不可。且尺之長短。虞夏以前則生於律。故書云同律度量衡。殷周有天下。其立權度量。與改正朔諸事。皆與民變革。見大傳故其時律尺自爲律尺。僅守於樂官。而民用之尺。則因璧以爲之準。考工

記玉人職云璧羨度尺好三寸以爲度是也就觀玉人所制桓圭琬琰璧琮大璋中璋皆九寸其于瑑圭璋琮琬則直言八寸使周尺止分八寸則凡八寸者何以不言尺九寸者何以不言尺有一寸乎范景仁不明尺皆十寸而曰王制古步八尺八寸之尺也今步六尺四寸十寸之尺也然則古步今步同矣何以古者百畝爲今之百五十六畝有奇乎陳用之據玉人典瑞鄭註謂周時八寸十寸皆爲尺而以此文六尺四寸爲八尺取爲八寸尺之證此與范景仁之失同皆泥于舊聞而不考之經傳者也愚有辨尺度書二首詳言之附載周官辨非後

月令

孟春之月日在營室仲春之月日在奎季春之月日在胃孟夏之月日在畢仲夏之月日在東井季夏之月日在柳孟秋之月日在翼仲秋之月日在角季秋之月日在房孟冬之月日在尾仲冬之月日在斗季冬之月日在婺女

按月令每月首言日在此指日躔言俗所謂過宮也鄭註以日月會言之誤矣夫日月之會必在朔日而日躔必隨中氣故日月之會多在前宮如孟春以姤嘗爲本宮而日躔未至十月之會尚在立按餘月類推至日躔本宮月與日相去有遠至數宮者一晝夜日行一度月行十三度十九分度之七唯閏月一宮凡三十度有奇約二日有奇而月過一宮

後月之朔。日月之行同宮。然其相會之時刻。亦未必與日躔之時刻。脗合。有先一二時。或三四時者。夫月之行速。一日差日十二度。有奇。唯會在躔後。則在本宮。若會先一時。則至躔時。已約差一度。先二時。或三四時。已差二度。若三四度。是則日躔在朔。雖行同宮。而其會。尙非本宮。況日躔之去朔遠者哉。且周天三百六十五度四分度之一。分爲十二宮。日躔一月一宮。有閏月之歲。日月多一會。而躔次止十二宮也。如以日月會言。日在何處。閏月之一會乎。又況記文止言日。原不必牽月爲言也。

春其帝太皞其神句芒其祀戶夏其帝炎帝其神

禮記集說卷二
祝融其祀竈中央其帝黃帝其神后土其祀中霤
秋其帝少皞其神蓐收其祀門冬其帝顓頊其神
玄冥其祀行

按太皞炎帝黃帝少皞顓頊此五人帝配五行者也五
時迎氣祭五行而人帝配焉句芒祝融后土蓐收玄冥
則五行之官是爲五正從祀於五人帝左傳家語謂之
五祀者也此唯天子得祀之至戶竈中霤門行之五祀
則上自天子下至大夫士皆得行之祭法天子七祀云
云皆不可信說者謂夏祀竈冬當祀井月令冬祀行是
記之誤白虎通云月令其祀井夫井水日用所資不輕
于竈行非水類何獨祀於冬其理頗長故後世多因之

鴻雁來

呂氏春秋作候雁北當從之。蓋仲秋之鴻雁來。季秋之鴻雁來賓。自北而來南也。孟春則自南而北矣。月令一篇原從呂氏春秋簡出。凡篇中字句不同者。皆當閱原本求解爲是。特爲拈出。迎春於東郊還反。原本反作乃屬下句讀。宿離不貸。原本作不忒。措之于參。保介之御。間原本參在于上。仲春命樂正習舞釋菜。原本作入舞舍采。季春命國儺。原本作國人儺。孟夏迎夏於南郊還反。原本作乃與孟春同。仲夏毋燒灰。原本作毋燒炭。季夏無或差貸。原本貸作忒。以搖養氣作搖蕩于氣。毋發令而待。作發令而于時。神農將

持功句首有命字。可以美土疆原本美作化。孟秋迎秋還反亦作乃。季秋師興不居原本作師旅必興。仲冬飭死事原本無此句。季冬雉雊雞乳原本作乳雉雊。

春居青陽夏居明堂中央居太廟太室秋居總章冬居立堂

此等名號唯明堂自古有之其餘不見于他經必呂不韋以意定之欲施之平一天下之後者也然自古唯天子之始祖廟得稱太廟今以生人所居于其中堂俱稱太廟此何義乎不韋自成不韋之書吾還其爲不韋之制而已必欲多爲之說奚爲乎

母殺孩蟲胎夭飛鳥

按魯語澤不伐夭韋昭註云草木未成曰夭此文已及孩蟲胎飛鳥下又言母麋母卵則恩及飛潛動矣夭字從國語解則植物亦皆得所益見周至上文禁止伐木則成材者也

孟春行夏令行秋令行冬令

按諸家於行令俱云君于孟春行孟夏孟秋孟冬之令仲春行仲夏仲秋仲冬之令餘倣此又曰孟月失令則三時孟月之氣乘之仲月失令則仲月之氣乘之季月失令則季月之氣乘之愚謂人君行令或失於怠或失於忘必無擇時而失者也必若諸解是孟月必擇孟月

而失仲季必擇仲季而失矣。且孟春行孟夏孟秋孟冬爲失令。將孟春行仲夏仲秋仲冬之令。及季夏季秋季冬之令爲非失乎。孟春行孟夏孟秋孟冬之令。則感召咎證如此。設人君於孟月有行仲季令者。卽無所感召乎。記文言此戒人君行令不容差忒。解者當渾融以會其意。若過爲分析。反失之矣。或曰。如此則寅申巳亥子午卯酉辰戌丑未。其類不相應。奈何。曰。咎證之應。或以其類。人君之行令。不能保其孟月必不行仲季之令。仲季必不行孟令也。再按每月之令。有因時而行。不可通於他月者。有可以常行者。有是月不可行。卽他月亦不可行者。卽以孟春言之。如迎春祈穀耕籍布農諸事。

此因時而行。不可通於他月者也。如布德和令行慶施。惠守典奉法掩骼埋胔諸事。此可以常行者。卽行之。他月必不召災也。至如變天道絕地理亂人紀兵戎從我起諸事。此是月不可行。卽他月亦不可行。行之不但如記所言咎證之應已也。然則所謂行某令行某令者。豈犯其所禁。如伐木覆巢諸事乎。然此瑣瑣之事。必非天子自行。而謂君於某時行某令。則咎應如此。其說終未可通。反覆思之。蓋天時之失令也。其咎應則如今之田家占驗也。曰。若是則人君失令。可弗恤乎。曰。吾非謂人君可以失令也。特就所應咎證驗諸所行之令。有以知其爲天時之失。若夫人君之令已詳於每月從之。則得

違之則失不既昭昭哉

仲春命樂正習舞釋菜

呂氏春秋作入舞舍采註云入學宮也舍置也置采帛於先師之前以贄神也按夏小正云二月萬用入學丁亥者吉日也萬也者干戚之舞也入學也者太學也謂今時大舍采也據此相參益知當從呂紀原文

季春薦鮪于寢廟乃爲麥祈實

按夏小正二月祭鮪鮪者美物也魚之先至者也其至有時謹記其時三月祈麥實麥實者五穀之先見者故急祈而記之也據此則薦鮪祈麥是二事不相因

仲夏養壯佼

佼矯通強也。

季秋合諸侯制百縣爲來歲受朔日

舊說因秦建亥以此月爲歲終非也。考史記秦之以十月爲年始在始皇二十六年。天下之後月令成於不韋。王用夏時意其時東周旣滅不韋擅政已改周正之建子而爲建寅。至始皇一天下之後卽因建寅而改十月爲年始。是謂建亥。然非不韋著此書之本意也。因始皇後日建亥遂取建亥以釋是書可乎。然此季秋而曰爲來歲受朔日何也。頒明年正朔也。諸侯國有遠近故於季秋頒之而正朔則是建寅。此時秦雖未一天下而有天下已過半必有頒朔之事。若據此來歲受朔日之

文謂此書卽主建亥則孟冬有云祈來年於天宗季冬有云順時令以待來歲之宜者來年來歲又將何指乎不韋改建寅說見質疑

孟冬大飲烝

大飲者天子養國老庶老鄉國則徧行鄉飲酒之禮也烝冬祭也是二事

天子乃祈來年于天宗大割祠於公社及門閭

此秦國所行之禮不韋卽著之以爲天子之禮耳孔疏謂天宗公社門閭謂之蜡按郊特牲言天子大蜡八不及此數者豈數者之祀反小而不得謂之大蜡乎必不然也所以於此月祈來年者秦初奉周正朔此月之次

月。卽是來年。故祈於此月。此改建寅。尙因之而未變耳。

臘先祖五祀勞農以休息之

臘祭。在周爲蜡祭。但郊特牲載八蜡。不及先祖五祀。而此言臘先祖五祀。亦是秦國所行之禮。且是月旣烝。則已祭先祖。五祀已分祀於四時。此復臘之。不病數乎臘。爲秦祭。而左傳云。虞不臘者。周以亥月爲臘月。是月索饗萬物。卽名蜡祭。秦則直名之曰臘。其祭之神亦異。獨勞農休息。則同於周耳。

仲冬命之曰暢月

是月陽生。故曰暢月。陽方生而曰暢者。扶陽之義。喜之之詞也。不與上文連。

曾子問

曾子問曰昏禮既納幣有吉日女之父母死則如之何孔子曰壻使人弔如壻之父母死則女之家亦使人弔父喪稱父母喪稱母父母不在則稱伯父世母壻已葬壻之伯父致命女氏曰某之子有父母之喪不得嗣爲兄弟使某致命女氏許諾而弗敢嫁禮也壻免喪女之父母使人請壻弗取而后嫁之禮也女之父母死壻亦如之

先儒於此章不得其解謹爲辨之其葬而致命謂雖已葬而喪未除不可行昏禮需除喪卜吉之意原非使之別嫁他人也其弗敢嫁蓋曉致命之意弗敢從前吉遣

嫁以俟其除喪原非欲嫁他人而不敢也。今乃以致命爲恐失嘉禮之時使之他嫁以弗敢嫁爲弗嫁他人固已謬甚至壻弗取而后嫁之謂壻守前說不取其請而后此女嫁於他族噫此豈聖人之言乎。夫旣云納幣有吉日則六禮已行其五特未親迎耳。免喪之後何不可娶而必令嫁他族邪。考士昏禮宗子父母沒則已命人迎而不親往故有不親迎之禮此云壻弗取者不親迎也。而后嫁之卽嫁此壻也。內則篇云女子二十而嫁有故二十三年而嫁所謂有故卽有父母之喪也。二十三而嫁卽嫁十五許嫁之夫也。曲禮云女子十五而笄內豈適他人乎。要知免喪之後男必娶女必嫁舍已定之婚

配而別求他偶。卽六禮豈能遽行。歲月更須有待。所謂嘉禮之時。恐因之而更失矣。且前此納采問名。納吉納徵。請期皆其父主之。媒氏通之。告於禰廟而行之。亦既慎重其事矣。一旦無故而絕之。此豈近於人情乎。或疑魯文公娶在三年之外。君子尚譏其喪娶。免喪而娶。志不忘婚。君子惡其忘親也。中指喪夫春秋所以譏喪娶者。以爲三年之內不圖婚。僖公之薨。未二十五月而遽行納幣諸禮。故雖娶在三年之外。而圖婚則在三年之內。是以譏之也。此旣納幣有吉日而後居喪。喪畢而成禮。豈有圖婚之志乎。若因其終娶而遽誅其志。聖人不若是已甚也。

孔子曰取婦之家三月而廟見稱來婦也擇日而祭於禰成婦之義也 曾子問曰女未廟見而死則如之何孔子曰不遷於祖不祔於皇姑壻不杖不菲不次歸葬於女氏之黨示未成婦也

三月廟見卽士昏禮所謂婦入三月然後祭行也謂行祭於高曾祖廟此指舅姑在者言擇日而祭於禰卽士昏禮所謂舅姑旣沒則婦入三月乃奠菜也鄭氏註昏禮三月祭行爲助祭而不指爲廟見孔氏又因昏禮無見祖廟正文遂於此條疏謂廟見祭禰只是一事然則舅姑在者高曾祖之廟婦可以不見乎按下文云女未廟見而死不遷於祖不祔於皇姑可見廟見非指祭禰

何則。祔必以昭穆。孫婦必祔祖姑。皇姑。祖姑也。生時未
廟。見故死。不遷。不祔。昏禮記所謂三月。然後祭行者。乃
行祭於高曾諸廟。而以婦見。與此記三月廟見之文相
發。此謂士也。若大夫有始祖廟者。則并見始祖廟也。其
或支子之小宗。止有祧廟。若祖廟。或未有廟者。則已見
於已所得祭之廟。而餘廟則統於宗子以見之也。三月
而見者。歲有四時之祭。率三月一舉。婦之廟見。必依於
時祭。然婦入而遇時祭。或一月而遇。或二月三月而遇。
遠不過三月。舉遠以包近。故曰三月。非必定於三月也。
廟見必依於時祭者。時祭必有主婦薦豆。且亞獻。有諸
婦助祭所取。而爲冢婦也。舅存則從姑。舅沒則姑老。而

婦卽爲主婦。所娶而爲衆婦也。亦必從姑。若宗婦。故必於時祭之先。擇日行之。而後可以與於祭。其不卽於時祭。見者。祭禮煩。廟見禮簡。且祝辭難兼。故於祭禴言擇日。明不與時祭同日也。廟見之禮。若何。卽儀禮三月食菜之禮。通之可也。廟見亦擇日。祭禴亦三月互見也。廟見亦成婦義。祭禴亦稱來婦。亦互見也。

當七廟五廟無虛主。虛主者。唯天子崩。諸侯薨。與去其國。與祫祭於祖。爲無主耳。祫祭於祖。則祝

迎四廟之主

祫祭卽王制所謂祫禘。祫嘗祫烝之三祫也。合祭於太祖之廟。故曰祫祭於祖。謂別有祫祭者非。

曾子問曰當祭而日食犬廟火其祭也如之何孔子曰接祭而已矣

當祭而日食可承上章謂是嘗禘郊社五祀之祭至犬廟火止宜言是郊社五祀之祭不可及嘗禘蓋嘗禘行於太廟如當嘗禘而犬廟火則救火不暇安能接祭乎曾子問曰君出疆以三年之戒以禭從君薨其入如之何孔子曰共殯服則子麻弁經疏衰菲杖入自闕升自西階如小斂則子免而從柩入自門升自阼階君大夫士一節也

檀弓云君卽位而爲禭歲一漆之故出疆卽以禭從備急變也喪大記禭之外有屬與大棺此云以禭從則在

外大斂止於柩屬與大棺殯時備用其殯服供殯事之物也闕觀闕非毀牆之謂此言闕不言門下言門不言闕相互也升自西階周人殯於西階上也時已大斂尸既在柩入卽可殯故於西階舊說謂柩從外來有似賓客故就客階非也小斂尸未入柩入時尸在前柩在尸後子在柩後故曰子免而從柩升自阼階周人大斂於阼時方小斂升阼階就大斂也舊說謂親未入棺猶以事生之禮事之亦非也

宗子有罪居於他國庶子爲大夫其祭也祝曰孝子某使介子某執其常事攝主不厭祭

按此篇云祭殯必厭大戴禮天圓篇云無尸者厭也知

此不厭祭。當從吳。勿清解。謂但祭正統之親。不及宗子。殤之陰厭。不及凡殤。與無後者之陽厭。爲是蓋祭成。喪必有尸。有尸則非厭。先儒因特牲少牢二禮未迎尸之前。祝酌奠於鉶南。以祝神。此時無尸。遂謂之陰厭。尸出之後。養畢。佐食徹尸俎。設於西北隅。此時無尸。遂謂之陽厭。非也。夫祭之初。祝酌奠祝神者。此降神也。天子諸侯之祭。用鬱鬯之酒。灌地降神。大夫士不得用。故於尸未入之前。祝酌奠於鉶南。祝饗。佐食取黍稷膚祭於苴茅上。祝取奠解祭於茅。主人再拜稽首。乃出迎尸。此非降神而何。奈何以爲陰厭也。此禮詳見士虞禮。蓋士虞特牲少牢。本互見也。若夫養畢西北隅之設。正如士喪

禮大小敘之奠既徹必設於序西南當西榮處不褻神
餘也。禮器云設祭於堂爲祔於外于彼乎于此乎此君
祭然也。特性少牢之改設於西北隅亦卽于彼于此之
意。奈何以爲陽厭乎。且厭之爲言飽飫之義也。祭方始
而奠祝安得遽飽。下章言陽厭當室之白以其在屋漏
受牖之明處故曰陽也。今考二禮之改設則屏用筵。屏蔽
之也筵席也且闔戶牖俾之幽闇于當室之白謂何。吾所不
取也。

殤不祔祭

殤孫雖祔祖然祭祖時孫不得與故曰不祔祭。蓋陰厭
以祭宗子之殤陽厭以祭凡殤。殤別有祭下文自明先

儒因喪服小記云殤與無後者從祖祔食遂改此文爲殤不備祭殊可怪也

文王世子

食上必在視寒煖之節

在字當如字解後同

凡學世子及學士必時春夏學干戈秋冬學羽籥皆於東序小樂正學干大胥贊之籥師學戈籥師丞贊之胥鼓南春誦夏弦大師詔之瞽宗秋學禮執禮者詔之冬讀書典書者詔之禮在瞽宗書在上庠凡祭與養老乞言合語之禮皆小樂正詔之於東序大樂正學舞干戚語說命乞言皆大樂正

授數大司成論說在東序

先王立學造士其教非一端其居非一處蓋學其統名而瞽宗上庠東序卽一學中之別名也其官則大司成爲之長主論說大樂正次之主授數其屬有小樂正教干及詔祭與養老乞言合語之禮而大胥贊之學干有籥師教戈而丞與胥贊之大師主詔絃誦執禮主詔禮典書主詔書因其人因其時而教行焉三代盛時所以無不成之材也

公族在宗廟之中其登餽獻受爵則以上嗣

宗廟君之宗廟也上嗣公族之適長子也此言天子諸侯宗廟之祭公族助祭者有此登餽獻受爵之禮唯上

嗣得與重適也。其禮亡無可考。舊說引特性禮爲據。特性士禮也。豈可語于天子諸侯之祭乎。愚於特性禮。嗣舉奠及祭畢。宗人遣舉奠食餕甚以爲疑。求其說而未安。斷不敢以其近似而據爲此節之解也。按祭統云。尸謖。君及卿四人餕。君起。大夫六人餕。大夫起。士八人餕。士起。具陳於堂下。百官餕。是則餕有登堂不登堂之異矣。又曰。尸飲五。君洗玉爵獻卿。尸飲七。以瑤爵獻大夫。尸飲九。以散爵獻士及羣有司。有獻則有受。是獻與受爵只是一事。特未知上嗣之於此二禮如何耳。

其公大事則以喪服之精麤爲序。雖於公族之喪亦如之以次主人。

公族之於天子諸侯以親則父兄子弟也以分則君臣也。喪服臣爲君服斬衰三年。衰三升有半。此不分同異姓親疏族屬皆然。而其位。次。序。列。則依其本服之精麤。如君之諸父兄子弟齊衰其本服也。是爲麤。其從父兄子弟及再從三從者大小功總麻其本服也。是爲精。麤者親而在前。精者疏而在後。陳可大謂臣爲君服斬衰衰制雖同而升數多寡各依本親若是則本親在大功者服八升九升布之斬衰。本親在小功者服十一升十二升布之斬衰矣。抑何不考之喪服乎。

始之養也適東序釋奠於先老遂設三老五更羣老之席位焉。適饌省醴養老之珍具。遂發咏焉。退。

修之以孝養也

按王制云。凡養老。有虞氏以燕禮。夏后氏以饗禮。殷人以食禮。周人修而兼用之。詳味此章。乃是以燕禮養老。而其升降獻酬與其席次。當如鄭註。準鄉飲酒禮推之。何則。燕禮膳宰爲獻主。此則天子親獻。燕禮大夫爲賓。賓唯一人。此則有三老五更羣老。故鄭謂三老如賓五更如介。羣老如衆賓。其言良是。發咏謂醴珍。旣具。天子遂迎老更入門。此時樂工奏樂。故云發咏入門之後。揖讓升拜。至拜洗。拜送爵。三老受爵卒飲而樂止。三老酢於天子。樂又作。天子卒爵。樂又止。郊特牲所謂賓入大門而奏肆夏。又云卒爵而樂闋。卽此也。然燕禮賓至庭。

乃奏肆夏賓受爵樂止與郊特牲所言不同者燕禮是君燕其臣郊特牲是賓主相燕故禮稍異養老事大天子親獻宜從賓主相燕之禮而五更羣老之獻亦必有樂退謂天子獻三老三老酢天子天子酬三老畢三老乃降立西階下當序東面一如鄉飲酒主賓獻酬畢賓降立之儀而五更羣老之獻一如鄉飲酒之介與衆賓其降立之儀亦同蓋自省醴以至獻酬天子必躬親之所謂修之以孝養也祭義及樂記所謂食三老五更於大學是以食禮養老也說見樂記

正君臣之位貴賤之等焉而上下之義行矣
正君臣之位是言席次當考鄉飲酒禮燕禮大射儀諸

禮始明鄉飲酒主人席阼階上西面燕禮大射儀公席亦在阼階上西面今養老畧同鄉飲酒禮則天子主席當在阼階上西面與燕禮大射儀公席同燕與大射宰夫爲主人公席于阼乃是君位今天子踐阼行事雖主位實君位也三老之席如鄉飲酒之賓當在戶牖間南向與燕禮大射之賓席同五更之席如飲酒之介當在西階上東面與燕禮大射樂工之席畧同羣老之席當如飲酒之衆賓在賓席之西與燕禮大射儀小卿及大夫之席畧同燕與大射之賓工及小卿大夫之席乃是臣位今老更雖居賓介之位實則臣位也故曰正君臣之位天子居君位是貴老更居臣位是賤老居賓位是

貴更居介位。是賤。故曰貴賤之等。等位既正。而上下之義行矣。

禮器

先王之立禮也。有本有文。忠信禮之本也。義理禮之文也。無本不立。無文不行。

按義理爲文。此意最精。本固爲內。文亦非外。禮以義爲質。安得爲外。謂之文者。亦就忠信對言耳。有忠信之實。心以爲主。而裁度吾心。必合於義理之安。而後行之。行之得其條理。卽謂之文。由內心有義理之裁制。斯外自得其條理。故曰義理禮之文也。無文不行。禮以義起也。禮有以少爲貴者。大路繁纓一就。有以素爲貴。

禮記集說卷二
三
者大路素而越席

大路祭天所乘之本路也。殷周皆然。先儒信周官謂周祭天乘玉路。玉路就多而文飾。則是以所賤事天。已豈其然乎。大戴禮朝事篇曰。天子樊纓十有再就。上公九就。侯伯七就。子男五就。要知周常時所乘。未嘗不以多爲貴。文爲貴。而此獨貴乎少與素者。尊祭天之車也。郊特牲言周郊而曰乘素車。素車非卽此大路乎。愚於周官巾車詳辨之矣。

禮有以文爲貴者。天子龍衮。諸侯黼。大夫黻。士玄衣纁裳。天子之冕朱綠藻十有二旒。諸侯九上大夫七下。大夫五。

此周冕服之制。龍衮績於衣。黼黻繡于裳。天子至尊。故取衣之龍以名。諸侯大夫卑。故取裳之黼黻以名。衣尊而裳卑也。又諸侯有國。主斷國事。黼之言斷也。大夫輔國。主辨國是。黻之言辨也。冕以朱綠爲藻。亦周制。先儒疑爲前代之制。非也。餘見周官司服條。

魯人將有事於上帝必先有事於頌宮

頌宮魯學名。古人立學必有先聖先師。魯立頌宮。以后稷爲先聖。文王爲先師。說見郊特牲將郊而先有事告后稷也。季秋大饗明堂。亦先有事以告文王。

子

經孫

承天

較刻

禮記偶箋卷二終

於隆己明歲
孫福重扶邪

禮記偶箋卷三

四明萬斯大克宗學

郊特牲

郊特牲而社稷犬牢

郊祭天用特牛。配以后稷。亦特牛。故名誥用牲於郊。牛
二。社稷主祭。畿內土穀之神。祭法所謂王社也。配以句
龍。后稷皆用大牢。名誥社於新邑。牛一羊一豕一。止一
犬牢者。祭率土地祇。無稷無配故也。說見下文。

諸侯不敢祖天子

說者據左傳魯襄十二年吳子壽夢卒。臨於周廟。謂魯
以周公故得祀其所出之祖。故立文王廟。非也。又有謂

成王賜周公以天子禮樂得行郊禘故立文王廟亦非也。左傳雖言周廟不明言是文王廟而魯之郊禘始于僖公其謂成王賜之者後人假托之辭也。魯安得有文王廟。左傳所云周廟蓋卽類宮也。魯立類宮之學以后稷爲先聖。文王爲先師。後人見后稷文王爲周天子之祖而魯得祀之於學遂謂爲周廟。是則魯之祀后稷文王於類宮者以之爲先聖先師而非以爲祖也。謂之周廟已非其義。謂之文王廟不幾於祖天子乎。使魯果祖天子而立文王廟此記何以不明言之也。或曰諱之也。夫記禮之文與春秋不書內惡異何爲而諱之乎。曰子何以知類宮祀后稷文王。曰禮器云魯人將有事於上

帝必先有事於禋官。先有事者。告后稷也。周公之言曰。文王我師也。然則魯學以后稷爲先聖。文王爲先師。何疑哉。

諸侯不臣寓公。故古者寓公不繼世。

按喪服傳。寄公爲所寓。齊衰三月。言與民同也。蓋不臣者。主之所以厚賓。服之者。賓之所以報主。各盡其道而已。

社。祭土而主陰氣也。君南鄉於北墉下。答陰之義也。日用甲用日之始也。天子太社。必受霜露風雨。以達天地之氣也。社所以神地之道也。地載萬物。天垂象。取財於地。取法於天。是以尊天而親地。

也故教民美報焉

此天子於夏日至祭率土地示於北郊之社也卽大折
卽方丘無稷說詳質疑

郊之祭也迎長日之至也大報天而主日也兆於
南郊就陽位也掃地而祭於其質也 於郊故謂
之郊 郊之用辛也周之始郊日以至 祭之日
王被袞以象天戴冕璫十有二旒則天數也乘素
車貴其質也旂十有二旒龍章而設日月以象天
也

郊卽太壇卽圜丘此文言周郊事最詳車旂冕服一以
此文爲正辨見學禮質疑及周官辨非

天子大蜡八伊耆氏始爲蜡蜡也者索也歲十二月合聚萬物而索饗之也蜡之祭也主先嗇而祭司嗇也祭百種以報嗇也饗農及郵表畷禽獸仁之至義之盡也古之君子使之必報之迎貓爲其食田鼠也迎虎爲其食田豕也迎而祭之也祭坊與水庸事也曰土反其宅水歸其壑昆蟲毋作草木歸其澤

八蜡司嗇一。百種二。農三。郵表畷四。貓丑虎六。坊七。水庸八。蓋司嗇卽先穡不可分爲二。貓虎二物不可合爲一。經文自明。諸說未了。主先嗇而祭司嗇謂八蜡以先代始嗇之人爲主而司嗇卽始嗇之神故以爲首報嗇

二字蒙上司嗇百種二者而言言祭二者皆所以報先
嗇也合聚萬物而索饗之但以此八神爲主

皮弁素服而祭素服以送終也葛帶榛杖喪殺也
黃衣黃冠而祭息田夫也野夫黃冠黃冠草服
也

京山郝氏云皮弁素服天子諸侯蜡祭之服黃衣黃冠
民間蜡祭之服此說是也先儒謂蜡用皮弁素服臘用
黃衣黃冠玩此記上下文俱詳言蜡事並不及臘奈何
意爲牽合乎按周以亥月爲臘月故宮之奇有虞不臘
之言謂不及臘月非謂不及臘祭也秦則臘月卽名臘
祭而所祭者及先祖五祀與此篇所言蜡祭不同說見

月令臘先祖五祀條 雜記子貢觀蜡孔子曰百日之蜡一日之澤卽息田夫也

內則

適子庶子祇事宗子宗婦雖貴富不敢以貴富入宗子之家雖衆車徒舍於外以寡約入子弟猶歸器衣服裘衾車馬則必獻其上而后敢服用其次也

族人於大宗不定是兄弟或尊而爲祖父行或卑而爲子孫行彼爲宗子卽當宗之故雖宗子爲吾之子行或從弟猶當歸器物以奉之不敢以卑幼而忽之也子弟且然況父兄乎必獻其上就尊行爲宗子者言子弟不

可言獻故曰歸

子能食食教以右手能言男唯女俞男鞶革女鞶
絲六年教之數與方名七年男女不同席不共食
八年出入門戶及卽席飲食必後長者始教之讓
九年教之數日十年出就外傅居宿於外學書計
衣不帛襦袴禮帥初朝夕學幼儀請肄簡諒十有
三年學樂誦詩舞勺成童舞象學射御二十而冠
始學禮可以衣裘帛舞大夏惇行孝弟博學不教
內而不出

教教者之事學學者之事十年之前知慮未開故須教
者爲主而使之學十年以後知識漸通故須學者爲主

而予以教。古人六藝皆於幼時習之。八年教讓。卽禮也。故十年曰禮師。初十年學書計。是書與數也。十三年學樂舞。學射御。則六藝全矣。讀者慎毋泥二十始學禮之文。謂禮非幼時事也。

玉藻

天子玉藻十有二旒。前後邃延。龍袞以祭。

此天子祭服之正也。冕十二旒。袞十二章。貫玉之藻。用朱絲。舊說此服唯施於祭宗廟。非也。凡祭皆然。辨見周官司服。或曰祭有大小。章服豈得無別。曰祭之大小。以神有尊卑也。然祭之者爲天子。豈因是而異其尊卑乎。天子十二章。上公九章。侯伯七章。子男五章。一定之制。

天子而服臣下之服斷無是理也

聽朔於南門之外閏月則闔門左扉立于其中

天子聽朔於南門外說者謂是明堂明堂在國之陽于理或然至謂告朔亦於明堂必以特牲告其帝及神非也。每月告朔用特牲祭法謂之月祭天子諸侯宗廟皆有月祭則天子告朔於廟可知閏月告朔同而聽朔異觀魯文不告閏朔左氏以爲棄時政則閏月同告于廟可知而聽朔之異則此文闔門左扉立於其中是也門卽明堂之門南鄉皇氏謂明堂有四門閏月各居其時當方之門恐未然

諸侯皮弁以聽朔於大廟

聽朔於大廟則告朔亦於大廟矣穀梁子云天子告朔於諸侯諸侯受於禰廟此言聽於大廟是受于禰廟而藏于大廟也故於大廟告朔竟卽於大廟聽朔而後徧告於高曾祖考之廟皆以特羊祭法謂始祖高祖廟無月祭非也

登席不由前句爲躡席爲去聲

禮席升降正由上下羣居升席則趨隅皆不由前所以然者爲躡席也說詳曲禮

深衣

參用師說總錄深衣篇便考也

君衣狐白裘錦衣以裼之君子狐青裘豹褰玄綃衣以裼之麕裘青豸褰絞衣以裼之羔裘豹飾緇

衣以裼之狐裘黃衣以裼之 裘之裼也見美也
服之襲也充美也

觀此則知裘外有裼衣裼衣外有襲衣去襲衣曰裼加
襲衣曰襲裼衣直領故見裘之美襲衣卽深衣深衣衣
裳相連全體掩蓋美不外見故曰充美

尸襲

後章云禮不盛服不充卽充美之謂也尸襲者以孫之
身象祖之身禮盛充美故襲也

古之君子必佩玉右徵角左宮羽趨以采齊行以
肆夏周還中規折還中矩進則揖之退則揚之然
後玉鏘鳴也

徵角宮羽言佩玉之制有厚薄之分故其聲有清濁之異五音宮最濁角清濁之間徵次清羽最清玉厚則聲濁爲宮玉厚薄中則聲清濁中爲角玉次薄則聲次清爲徵玉最薄則聲至清爲羽五音宮爲首故左次生徵故右次生商居五之中故不列次生羽故左次生角故右左先右後故佩玉之制亦以相生之序一先一後也王既合乎宮徵而君子之趨行進退復皆有節故衝牙觸佩自然鏘鳴中律

禮不盛服不充故大裘不裼乘路車不式

此謂郊時也王衣大裘衮衣以裼之郊特牲云王被衮以象天是也衮外更襲以衣是之謂充美路車郊特牲

所謂素車卽木路也蓋大路也素車也路車也木路也一而已矣

賓入不中門不履闕公事自闕西私事自闕東按聘禮行聘享時賓介皆入門左此公事自闕西也及行私覲賓入門右擯者辭乃入門左上介亦然士介初入門右擯辭士介不敢入門左卽於門外拜送是私事不皆自闕東也禮特言其初耳

明堂位

朝諸侯於明堂

此篇所言朝諸侯之位及所謂明堂明諸侯之尊卑說皆不經至謂朝諸侯於明堂則實然也古者天子巡守

朝諸侯於方岳之下皆於明堂受朝故孟子時齊宣欲
毀明堂此則東嶽之明堂也東嶽有明堂則西南北嶽
亦有明堂可知四嶽皆有明堂則畿內亦有明堂又可
知孝經云宗祀文王於明堂非畿內之明堂乎考工記
云周明堂東西九筵筵九尺南北七筵崇一筵五室凡室
二筵此則明堂之制也獨其處所經傳無文從來之說
明堂在國之陽而玉藻云天子聽朔於南門之外夫聽
朔必於明堂則謂在國之陽者是也然而朝諸侯於明
堂經未實有所指考之覲禮有云諸侯覲於天子爲宮
方三百步四門壇十有二尋深四尺加方明於其上方
明者木也上介皆奉其君之旂置于宮公侯伯子男皆

就其旂而立。天子出拜日於東門之外。反祀方明。此就
在覲禮既終之後。蓋指天子巡狩諸侯朝於方嶽之下。
有明堂以受朝。此官卽方嶽之明堂也。畿內則天子受
覲於廟。既覲之後。當亦就明堂以布政。其壇在方嶽者。
以祀方明。在畿內者。卽子月日至郊天之大壇。明堂大
壇同在三百步內。古者步百爲里。方三百步方三里也。
大饗明堂。則以文王配。說者緣此。謂明堂卽文王廟。豈
有當乎。大戴禮明堂篇載明堂之制。與考工不同。而茅
屋蒿宮。殊近怪妄。獨所云其官方三百步。與覲禮合。則
覲禮之官卽明堂。益可知矣。明乎此制。則淮南子淳于
登公玉帶諸家。可以盡廢。先儒紛紛其說。奚爲哉。

成王以周公爲有勲勞於天下命魯公世世祀周公以天子之禮樂是以魯君孟春乘大路載弧韞旂十有二旒日月之章祀帝於郊配以后稷天子之禮也

孟春建子之月也周天子一歲祭天凡四郊也祈穀也大雩也大饗明堂也四者之中唯郊大報天禮爲盛大據此文魯直僭行日至郊禮而祈穀大雩更不必言故孟獻子曰正月至可以有事於上帝與此合唯左傳有云啟蟄而郊又云郊祀后稷以祈農事先儒信之遂謂魯雖僭郊止行祈穀禮不行日至禮豈知左傳所云者固皆魯僭郊之後諱言日至之郊而托言祈穀以輕

禮言什卷之三
其事猶其自僭王禮而托於成王之賜如此文之說也
餘詳質疑

季夏六月以禘禮祀周公於大廟

按此文言禘周公於大廟而不言祭文王合之公羊文
二年大事於太廟傳言毀廟未毀廟之主皆升而不及
所自出之帝觀之知魯但僭用天子之禮樂如此篇所
云者以祀周公非必祭文王爲所自出之帝以周公配
也上文云祀帝於郊配以后稷若果祀文王以周公配
亦當如郊例明言之矣又孟獻子云七月日至可以有
事於祖魯遂以七月行禘此言六月殆初行禘時如此
後乃因獻子之言而定于七月耳說詳質疑

有虞氏服韍夏后氏山殷火周龍章

服冕服也。四代皆十二章。虞以韍名。故曰韍冕。禹之致美乎韍冕。猶仍虞名也。後更以山名。殷則以火名。周以龍章名。龍形衮然。故名衮冕。先儒謂爲韍制。四代增加。豈一韍而備諸采乎。且山龍皆衣之章。而下移於韍。聖人不若是無別也。

讀明堂位

予嘗讀左氏傳。齊桓公問仲孫湫曰。魯可取乎。對曰。不可。猶秉周禮。晉韓宣子聘魯。見易象與魯春秋。曰。周禮盡在魯矣。吳季札聘魯。觀樂歌。則風雅頌畢。陳舞則異代咸備。竊疑魯雖周公之後。亦諸侯之國耳。奚以獨備

禮樂豈制作出自周公故魯獨守之乎。王朝侯國制各不同。當時侯國禮樂諒必同時班布。魯不得獨異也。謂周公制作魯獨守之。是周公自私其子孫矣。有是理乎。然則魯何以獨備禮樂。曰。因郊禘而有之也。魯何以得有郊禘。曰。僭也。成王之賜伯禽之受。非乎。曰。重耳請隧。襄王猶知却之。成王賢主也。必不以非禮加人。周公抗世子法於伯禽。伯禽固知禮者。必不以非禮受。其謂成王賜而伯禽受者。蓋魯後人既僭用之。恐遺譏後世。假先王先公以自文耳。然則仲孫湫韓宣子何以稱之。曰。僭既久矣。卽魯之子孫亦且相忘。况他國之卿乎。久假而不歸。惡知其非有也。曰。是則然矣。孔子嘗言魯一變。

至於道又曰我觀周道幽厲傷之吾舍魯何適矣非與其禮樂之獨存乎蓋孔子之時周衰已甚禮樂淪亡猶幸魯僭竊之餘尙存十一于千百孔子此言殆因敗以爲功之意也東周可爲卽公山叛人無不可往孔子救時之苦心大不得已也然則魯之守禮樂非乎曰非謂守之非也冒而行之不可也歌雍八佾大夫儼然天子君實啟之其又奚尤故人知周禮賴魯而存予謂周禮由魯而亡因讀明堂位爰誌於後

喪服小記

庶子不祭祖者明其宗也

惟適孫得祭祖外此雖支子之適子亦與庶孫同不得

祭也

爲慈母後者爲庶母可也爲祖庶母可也

按禮云喪有無後無無主此言爲庶母爲祖庶母蓋爲之喪主也若云爲後則此子業爲慈母後矣何得又爲庶母祖庶母後乎況以孫爲祖庶母後昭穆更不合邪大傳

禮不王不禘王者禘其祖之所自出以其祖配之諸侯及其太祖大夫士有大事省於其君于禘及其高祖

禘卽王制祭統所謂時祭之禘也行於每歲午月上追自出之帝下及毀廟未毀廟之主爲合祭之大故又曰

大禘或曰經言以其祖配之恐止以始祖配諸祖不及也。曰詳玩下文諸侯大夫士之文卽知天子之禘當爲禘矣。况確有王制禘祫之文可據乎。辨見質疑。

牧之野武王之大事也。旣事而退柴於上帝祈於社設奠於牧室遂率天下諸侯執豆籩逡奔走追王大王亶父王季歷文王昌不以卑臨尊也。

按武成云丁未祀於周廟邦甸侯衛駿奔走執豆籩越三日庚戌柴望大告武成。與此不同。以書爲正道王之說與中庸不同。以此爲正先儒泥中庸追王大王王季之文及緯書之說謂文王早已稱王且謂文王已追王大王王季號謚未定至武王時定之而周公之追王大王

禮記集說卷三
王王季乃以王禮改葬而其不改葬文王以其先以王
禮葬故也凡此皆誣妄之詞也緯書之言固不可信卽
中庸所云亦當善會章內言文王屢矣此復言周公成
文武之德故於追王止言大王王季而不及文王文勢
如此實包追王文王在內也不然豈小心服事如文王
而及身稱王也哉

宗法

詳見質疑

少儀

受立授立不坐性之直者則有之矣

此言本坐之人有受於立者有授於立者則起而不坐
若坐而不起是直情徑行矣舊解非

贊幣自左詔辭自右

按聘禮賓介私覲宰於公左受幣是贊幣自左也覲禮既覲天子使諸公賜服太史致命公在左太史在右是詔辭自右也

凡羞有湑者不以齊

湑汁也少宰儻尸有羊肉湑羊七湑豕七湑羊肉湑湑中有肉者羊七湑豕七湑純湑無肉者此言羞有湑者蓋羊肉湑之類已有鹽梅之和故不以齊若大羹直是清汁不齊不必言也

尊壺者面其鼻

此專就人君說尊壺非謂尊與壺尊猶設也壺酒尊也

儀禮尊兩壺於房戶間面其鼻言設君之酒尊者必以鼻鄉君玉藻云唯君面尊是也

學記

比年入學中年考校一年視離經辨志三年視敬業樂羣五年視博習親師七年視論學取友謂之小成九年知類通達強立而不反謂之大成夫然後足以化民易俗近者說服而遠者懷之此大學之道也

比年入學專言升入國學者蓋十五入大學後乃中年考校如是五次乃爲大成而足以化民易俗也故曰此大學之道也考校是主教者之事而中年考校則就學

者言。蓋入學者既比年皆有。則考校亦必比年舉行。特就其中分別其一年三年五年七年九年者而異視之。其未三年七年者則去年已考。今年姑舍之可也。如此則雖比年考校在入學者是二年一受考。故曰中年考校。考校在禘後。

末卜禘不視學游其志也

禘行于每歲午月。必卜禘後。乃視學。使學者得以優游其志而精其業也。視學何爲考校也。先儒信五年一禘之說。謂不當禘之年亦待時祭之後。然則何必言卜禘乎。

樂記

禮記集說卷之三
食三老五更於大學天子袒而割牲執醬而饋執
爵而醕冕而總干所以教諸侯之弟也

按周人養老兼用燕禮饗禮食禮故文王世子篇所云
養老是燕禮也此記所謂養老是食禮也其禮無可考
見畧準公食大夫禮言之謂之食者但食飯而不用酒
獻酬也鼎俎七牲用大牢割牲食禮不見養老則天子
袒而親割也公與賓升之後宰夫自東房授醯醬公設
之蓋醬爲饌之本故公親設養老天子亦親設也既陳
饌宰夫實飲酒于醴加于豐設于豆東三飯之後宰夫
進漿飲于稻西是卽醕爵也庭實旣設賓遂飲漱奠於
豐以降受幣乃復入卒食三飲食禮公不親醕養老則

天子親醕也。食禮不樂舞。養老則天子親舞。凡所以敬老也。

雜記

遣車視牢具。疏布綦四面有章。置于四隅。載粢有子曰非禮也。喪奠脯醢而已。

遣車視牢具。說具檀弓。疏布綦四面有章。車之飾也。置于四隅。載粢。謂載粢于車之四隅。倒文耳。所以置于車之四隅者。以乘車已載旃皮弁服。道車已載朝服。橐車已載簋笠等物于中。故置粢于四隅也。

泄柳之母死。相者由左。泄柳死。其徒由右。相由右。相泄柳之徒爲之也。

悼公弔有若之喪子游擯由左尊君也當時緣此賓弔亦由左則非矣泄柳因循未改其徒能復之故志之

士三月而葬是月也卒哭大夫三月而葬五月而卒哭諸侯五月而葬七月而卒哭士三虞大夫五諸侯七

虞祭皆以葬日爲始士葬月卒哭間日行祭大夫以上間月卒哭若亦間日虞則終虞與卒哭相去日遠于檀弓所言必於是日也接不合竊意大夫以上初虞皆是葬日自後或間五日或七日若九日以虞之多寡與日之遠近爲差唯終虞與卒哭耐祭三祭接續行事計見檀弓

孟獻子曰正月日至可以有事於上帝七月日至
可以有事於祖七月而禘獻子爲之也

日至在正月七月可以爲周正改月改時之證郊禘對
言可以爲禘祭每歲舉行之證

贊大行曰圭公九寸侯伯七寸子男五寸博三寸
厚半寸刻上左右各寸半玉也

曲禮言凡摯諸侯圭而此文更詳其長短廣狹厚薄之
度且降殺以兩形制昭然先儒信周官而謂子男執璧
何也

祭法

有虞氏禘黃帝而郊嚳祖顓頊而宗堯夏后氏亦

禘黃帝而郊。鯀祖顓頊而宗。禹殷人禘。嚳而郊。冥祖契而宗。湯周人禘。嚳而郊。稷祖文王而宗。武王禘。卽王制祭統所云時祭之禘。行于每歲。午月追祭太祖之所自出之帝於太廟。而以太祖及毀廟未毀廟之祖配之也。郊。子月日至祭天於南郊之太壇。而以祖配之也。祖。始祖。百世不遷之廟也。宗。後世有功德之祖。尊之爲宗。與太祖同爲百世不遷之廟也。周初始祖后稷郊亦配稷。而文武並爲不遷之宗。東遷之後。乃以文王爲始祖。武王爲宗。說詳質疑。○按孝經云。宗祀文王於明堂。以配上帝。此周公所制特典。蓋於季秋大饗上帝於明堂而尊文王以配之。明堂卽覲禮見諸侯之宮。其

方三百步爲壇而四門者也。將祀明堂亦告類宮。鄭氏牽孝經宗祀以釋此文殊不合。

燔柴於太壇祭天也。瘞埋於太折祭地也。用騂犢太壇卽南郊之園丘。太折卽北郊之方丘。下文太社亦卽此也。蓋以其至尊而言則曰太壇曰太社曰太折以其形而言則曰園丘曰方丘。名雖殊其實一也。祭天地皆用騂犢。第郊唯特牛。社則加羊豕而爲大牢耳。

王爲羣姓立社曰太社。王自爲立社曰王社。諸侯爲百姓立社曰國社。諸侯自爲立社曰侯社。

太社天子祭。率土之地而者也。與郊對舉。無稷王社天子祭畿內之士穀者也。不與郊對舉。有稷祭以勾龍。后

稷配國社祭竟內地而侯社祭一國土穀說詳質疑

祭義

建國之神位右社稷而左宗廟

左右路寢之左右也社稷王社侯社也考工記匠人營之

祭統

凡祭有四時春祭曰祈夏祭曰禘秋祭曰嘗冬祭曰烝祈禘陽義也嘗烝陰義也禘者陽之盛也嘗者陰之盛也故曰莫重於禘嘗古者於禘也發爵賜服順陽義也於嘗也出田邑發秋政順陰義也此言祈禘嘗烝與王制同而不兼諸侯且極言禘嘗之

義尤見正大發爵賜服歲歲舉行則禘之歲行益可見
世儒以王制祭統出漢儒不可信或且推爲夏殷之禮
不思漢初諸儒去古猶近所言必非無本此不可信而
必緯書曲說乃可從乎

曲說指三年一禘
五年一禘之說

深衣

深衣三袂縫齊倍要袷當旁袂可以回肘長中繼

袷尺袷二寸袷尺二寸緣廣寸半

玉藻

袷袖口也三袷者要尺寸之數三倍于袖口也袷尺二
寸圍之爲二尺四寸三其袷爲七尺二寸齊又倍之則
丈四尺四寸也袷襟也在左右故曰當旁袂可以回肘
指腋下運肘處不言尺寸者人身長短大小不等不可

一定當相體裁削無過寬無過窄可以回肘則已。深衣篇曰：袷之高下可以運肘，卽此也。長中繼揜尺，言袂之長也。中猶當也。言袂之長與手相當更餘一尺揜覆及肘，而衣一幅袂一幅，其長不足揜須別以布一幅中解之，繼續于左右袂，方足此數。故曰繼揜尺。深衣篇曰：袂之長短反屈之及肘，卽此也。袷領也以交而合，故名袷二寸，言其廣。袷尺二寸，黃先生云：此言其不縫者，統縫不縫，則袂末二尺二寸是也。緣卽純也。○從來言深衣者，布幅廣二尺二寸，度用指尺。予因卽予左手中指中節爲度，以度予身脊至中指端，凡長三尺八寸。深衣衣一幅，袂一幅，合得四尺四寸，去殺縫二寸，四尺二寸在

除身脊至指端三尺八寸止餘四寸反屈之不能及肘故知須布一幅分解繼續之也

古者深衣蓋有制度以應規矩繩權衡短毋見膚長無被土續衽鉤邊要縫半下

續連屬也衽衣襟也他禮服上衣下裳不相連唯深衣則衣之下際與裳之上際相連屬故曰續衽衣裳相續獨言衽者衽綴于衣之左右舉衽則全衣皆舉且裳十二片四片屬于左右衽既屬於衽則并此屬衽之裳亦可爲衽而全裳亦舉矣故言續衽可以括衣裳相屬之義也鉤謂鉤針密縫之也邊前後裳相合當腋下直垂處也他禮服之裳前三幅後四幅不相合唯深衣之裳

用布六幅解爲十二片。四片屬於後衣。四片屬於前衣。四片屬於兩衽。皆縫合之。但裳布半是正裁。半是斜裁。
三幅正裁。每片兩頭並闊一尺一寸。去殺縫二寸。淨得九寸。三幅斜裁。每片一頭狹得五寸。一頭闊得一尺七寸。去殺縫二寸。淨得一尺五寸。取斜裁之一片。合正裁之一片。狹頭三寸。闊頭一尺二寸。闊頭在齊爲二尺四寸。正裁屬向中。斜裁屬向邊。左右合之。要得二尺四寸。齊得四尺八寸。三之要總得七尺二寸。齊得二尺四寸。四尺。四一。旁是織幅。一。旁是剪口。唯前後中寸。是謂齊倍要。
縫皆值織幅。旁屬者。一是織幅。一是剪口。此須反復縫之。然不必鉤也。唯腋下前後裳邊縫合處。皆是剪口。必反復縫之。更密針鉤之。乃得牢固。故曰鉤邊。黃先生曰。續衽衣與裳相連屬之也。鉤邊縫合其前後也。深衣之所以得名由此。

裕之高下可以運肘袂之長短反詘之及肘帶下
毋厭髀上無厭脇當無骨者制十有二幅以應十
有二月袂圓以應規曲袷如矩以應方負繩及踝
以應直下齊如權衡以應平

裕當腋下縫合處黃先生曰從此而員之爲袂從此而
削之爲要故須量度肘之出入以爲高下是也制十有
二幅者衣六幅裳六幅也衣之六幅則以二幅爲衣身
長二尺二寸當腋處裁入下二幅爲袂長與衣同一幅
交解爲左右衽又以一幅中分繼續袂口爲揜覆裳見
袂圓應規者袂屬于衣從腋下量肘之出入裁入而漸
還之至於袂末仍得二尺二寸服時左右袂相合而員

玉藻祛尺二寸乃袂口之不縫者也曲袷如矩者衣開
脰孔以袷二寸加之其兩端斜綴於兩袷兩袷交掩其
袷自方

冠義

見於母母拜之

按儀禮冠者三加或醴或醺既畢取脯見於母母拜受
子拜送母又拜先儒疑之有謂脯自廟中來故拜受非
拜子者有謂母有從子之義故屈其庸敬以伸斯須之
敬者有謂此爲適長子代父承祖與祖爲正體故拜之
異于衆子者考禮婦人之拜有二一肅拜一手拜肅拜
者端肅立微俯躬非跪拜也手拜者手至地首至手跪

拜也。少儀云：婦人吉事雖有君賜，肅拜則此之拜受。肅拜也。母拜子亦何嫌。

鄉飲酒義

四面之坐象四時也

按下文云：坐賓于西北，坐介於西南，主人坐於東南，坐僎於東北，言其方也。又云：賓必南鄉，介必東鄉，主人必居東方，言其鄉也。考儀禮鄉飲禮第三云：乃席，賓主人介衆賓之位皆不屬焉，不明言方與鄉，故此義特詳之。然射義有曰：卿大夫士之射也，必先行鄉飲酒之禮，故鄉射未射之先，其飲酒與鄉飲酒禮同其布席也。賓南面，主人阼階上，西面皆正鄉也。二禮相通，原可互見。鄭註

鄉飲酒禮曰賓席牖前南面主人阼階上西面介西階上東面亦是正鄉俗儒方氏不通經義乃創爲賓面東南介面東北主人面西北候面西南易正鄉爲偏鄉天下後世奉而行之莫有覺其非者是可歎也詳見質疑鄉飲酒之禮六十者坐五十者立侍以聽政役所以明尊長也

按儀禮第三云主人就先生而謀賓介不及齒序故此義詳之言六十者坐知唯六十以上者得與飲酒坐列言五十者立侍知五十以下者不得坐也故儀禮記云立者東面北上若有北面者則東上卽指五十者也註疏不察謂儀禮爲賓賢能此爲正齒位不思戴記冠昏射

鄉諸義皆就儀禮爲之發明間補其闕畧不能互明其義而強爲分析多見其支離也又孔疏謂儀禮之賓介皆以年少者爲之不更証乎

六十者三豆七十者四豆八十者五豆九十者六豆所以明養老也

賓介豆數有常此專指衆賓言儀禮未詳故義明之於此見鄉飲酒禮賓介之外衆賓皆以齒序不得相踰故儀禮獻衆賓升拜受者唯賓長蓋鄉黨莫如齒理宜然也

射義

其節天子以騶虞爲節諸侯以貍首爲節卿大夫

以采蘋爲節士以采蘋爲節騶虞者樂官備也麋
首者樂會時也采蘋者樂循法也采蘋者樂不失
職也

按儀禮大射諸侯與其臣燕而射也其終奏貍首以射
而衆耦之大夫士不以采蘋采蘋鄉射卿大夫士飲酒
于鄉而射也其終奏騶虞以射而記又言歌騶虞若采
蘋皆五終若以此義文爲正則鄉射用騶虞爲僭矣豈
儀禮亦不可信乎此不可解闕之可也

孔子射於矍相之圃蓋觀者如堵墻射至於司馬
使子路執弓矢出延射曰賁軍之將亡國之大夫
與爲人後者不入其餘皆入蓋去者半入者半又